

Die Glocke vunn St. Gallus

Omm Mittwoch vor acht Daach hawwe de Schorsch unn isch uns die Fieß in de Bauch gestonne, unne uff de Hauptstrooß beim Gugge nooch dene zwaa Glocke, die de erst geweiht unn donn uff die Kerrschterm gehowwe werrn sollte.

Die kloo Glock ferrs kloone Terrmsche war schunn hinner de Kerrschemauer fast verschwunne, die hott merr driwwe vumm Schäfer aus garnitt gut sehe kenne. Awwer die gruß Glock hott joo grad vor uns uffem Oohänger gestonne, die konnt merr fast greife.

Seet de Schorsch: Dess iss joo e mords Ding, die Glock. Awwer nitt jeder Flerschemer will se hawwe.

Redde merr nitt defoo, habb isch gesaad, weil gut dut se ausseh, die Glock, Ess iss schunn ebbes Besonneres mett sooner Glock, moont de Schorsch.

Unn wie die aussieht, saach isch, su glatt unn meddere Owwerfläch mett su emm Schimmer e kloo bissi ins Goldene enoi, ei isch deet se gern emol oogreife.

No ja, seet de Schorsch, doo giehsde halt eniwwer unn dust se streichele.

Dess wollt isch awwer doch nitt mache, unn weil merr noch e bissi Zeit hadde, bis de Gottesdienst oogefonge hott, habb isch de Schorsch gefroochd: Waaßde noch, wie merr zu unserne Juchendzeit die Glocke geleit hawwe? Mett Seile in de Glockestubb?

De Schorsch hott merr uff die Schulter geklobbd. Unn wie die gruß Glock uns hochgezooche hott? Dess iss villeischd enn Spaß gewese!

Waaßde Schorsch, saach isch, wenn merr dess unserne Enkel verzähle dun, donn guge die su, als deede merr vumm diefsde Mittelalter babbele.

De Schorsch hott genickt. Ja, ess iss halt e nei Zeit unn vill vunn dem was heit su alles meeschlich iss, dess dun merr nimmi su verstieh. Ei isch glaab, mett dene Glocke jetz in Gallus, die werdd unsern Parre vunn soim Smartfon aus programmiern unn oosteuern kenne.

Ei nodierlich, saach isch, wanner donn vunn Limbursch vunnem Gespräch beim neie Bischof zurickkimmt, wo er ebbes erreicht hott ferr dess Flerschemer Kirchort, konner schunn vumm Wickerer Berrsch aus die Glocke in Beweeschung setze.

Eiern Honnes